

A luster l Stont de Ciampedel

L picol frabicat storic é stat restaurà per endrez del Comun de Ciampedel col sostegn de la Provincia de Trent e de l'Istitut Cultural Ladin



N retrat veie de Gabriele Valentini moscia l Stont e i tulaces sula traietoria.



N tulac da competizion originèl. (Istitut Ladin, emprest Federspiel).

Frabicac storic - N bel projet é dò a ruèr a compiment, se trata del restaure del veie Stont de Ciampedel. Chest frabicat, fat sù del 1905, l'era dò a jir en roina patoch, e chel de Ciampedel l'era amò un di pec ejempies conservé te dut nose raion de n Stont (per talian "casino di bersaglio", per todesch "Schießstand"), l'lech olache i omegn bogn de durèr la èrmes da fech se arcedèa a trèr al tulac.

Ti egn passé, de gra soraldut a Gabriele Valentini "Mambo" e ai Scizeres de Fascia, chest frabicat é stat salvà da la destruzion e amò te l'amministrazion passèda l'é stat troà na strèda anter Comun e Provincia de Trent, ensema con l'Istitut Cultural Ladin, per poder l restaurè e portèr a nef luster.

L projet de restaure del Stont de Ciampedel l'é stat fat dai architec Alberto Winterle e Lorenzo Weber, che aea lurà ence per la realizazion del Museo Ladin, e l se à vadagnà ence n pest de architettura.

L'Istitut Cultural e l Museo Ladin à endrezà dut l'alestiment espositif, con i tesé storic e divulgatives luré fora da la enrescides de P. Frumenzio Ghetta, Cesare Bernard e Maria Piccolin e amò apede retrac, documenc e ogeg. L lurier defora é oramai fenì e chel per i alestiment daite é beleche a compiment. Dant dal scomenz de la sajona da d'istà l Stont de Ciampedel vegnarà enaudà e n auter picol e prezios testimonèch de noscia storia sarà coscita a la leta de noscia jent e di ghesé.

N projet premià

L projet de restaure del Stont de Ciampedel ge à fat vadagnèr al studie Weber e Winterle n pest al concurs "Costruire il Trentino 2013/2016" endrezà dal CITRAC (Zircol Trentin per l'Architettura Contemporanea) e da l'Orden di Architec de la Provincia de Trent, nasciù jai 6 egn per portèr dant na cultura de l'architettura

contemporana tel Trentin.

Per chest concurs l'é ruà ite 131 projec, che é stac vardé fora da na juria internazionèla che a la fin l'à decidù de n premièr 4 e n menzionèr etres 6.

L restaure del Stont de Ciampedel l'é stat anter i 4 projet premiè e l'é stat fat te la prospetiva che l frabicat dovente na esposizion museala, travers la conservazion di elemenc originèl resté entriesc e la recostruzion de chel che era oramai massa a de mèl, tel respet de la carateristiches de chesta sort de strutures, oramai rères te nosc raion, duran l corten per l'usc e la postazions per tirèr.

L pest "Costruire il Trentino 2013/2016" é stat consegnà en vender ai 26 de jené a Trent e i lurieres che à tout pèrt al concurs é da poder veder a la Galleria Civica de Trent (Via Belenzani 44) ensin ai 4 de mèrz, con orarie 10-13 e 14-18, fora che de lunesc. L biliet l'é de 2 euro e la prima domenica del meis l'entrèda é debant. (lg)



L'architet Alberto Winterle da Pera.



L Stont de Ciampedel, restaurà su projet di architec Weber e Winterle. (Foto Davide Perbellini)